

SEFANIA gbouŋ

Ki j̄in Sefania gbouŋ na po

Sefania din kpaan Juda niib nan yoo baate ki Yennu tan saa dat ŋamm nan digbann nba kur ki sak u mɔb na tubir, li-i kii tee ki bi nyik bi toonbiit tumu.

¹ Maan nae ki Yennu din tur Sefania, yoo nba ki Amonn bija Josaya tee Juda teeb kpanbar na. (Sefania din tee kpanbar Hesehia booru ni nirɔe. Sefania baa din tee Kusi, ki Kusi baa tee Gedalia, ki Gedalia baa mun tee Amaria, ki Amaria baa tee kpanbar Hesehia.)

Ki j̄in Yennu buut daar na po

² Ki Yennu yet a, “N saa biir bont kur nba be tingbouŋ na ni, ³ li nisaarii kur, nan bonkobit, nan noonii, nan janii. N saa te ki toonbiit damm na n baa. N saa biir nisaarik kur, ki soɔ tan kan biar ki mɔk manfoori. Min Yennu-e pak na.

⁴ “N saa dat Jerusalem teeb nan Juda teeb kur tuba. N saa boont binba tan saa joont leŋ ki jiantir tingbann nba tee Baal na. Soɔ tan kan tiar mannteeb nba tuun teenɔ na po gbaa. ⁵ N saa biir binba do ŋei yura paak* ki jiantir ŋmaarik, nan yonnu, nan ŋmaabira na. N bia saa biir binba jiantir min Yennu, ki sent mɔsona a bi sii waan, ŋaan bia sent mɔsona tingbann Milkom sann ni

* **1:5** 1.5 Bi ŋei yura paak, bi din tuu sere.

na. ⁶ N saa biir binba yêť ki ji ki waan, ki bia ki baat n boor ki boi a man ŋmakitib na.”

⁷ Daar na pera, ki tee yoo nba ki Yennu saa kar buut paak; li paak, ii ŋmin man u tɔɔnn. Yennu tee siire a wun chab u niib ki bin kpib, ki jɔɔn bi datai a bin lekib, ki fat bi faar. ⁸ Yennu yeen a, “Nikpinu daar na ni, n saa dat saakab na tuba, nan kpanbar na bonjai tuba, nan binba kur tokii binba ki waan na tuba. ⁹ N saa dat binba kur jiantir, ki bi jiantu naan binba ki waan na tuba. Bi jaan, ki bia kpi niib, a bin fit gbeen bi tingbandiit nan fatuk bona na.”

¹⁰ Yennu ŋamm yet a, “Li daar, i saa gbat mɔniifuur Jan Tammɔkɔɔkir nba be Jerusalem na po. I saa gbat fabinii, doo na bɔk-paann na po, nan bona biiru fuur, kunkona paak. ¹¹ Yimm nba be doo na tiŋ po na-i tanji gbat linba na yoo nba, yii mɔ kii fabin man, kimaan kpinkpenta na kur saa kpowa.

¹² “Yoo maŋ ni, n tan saa jii fitire ki lon Jerusalem teeb, ki dat binba ki bi numm gboo bi mɔŋ, ki bi maa bi mɔŋ paak na tuba. Bi yeen bi mɔŋ a, ‘Yennu ki tuun bonŋann koo bonbiiri.’

¹³ Bi datai saa fat bi mɔkint, ki bia bit bi ŋei. Bi ji kan ban kɔɔ bi ŋei nba ki bi maa na ni, koo ki nyu daan nba nyi tilontii kpaant nba ki bi ko na ni.”

¹⁴ Yennu dajaann na nakin bonchiann, ki baat yian yian. Li daar sii tee datonne, ki kunkɔnkɔnna nba mɔk para na gbaa saa yikin nan janmaanii. ¹⁵ Li tan sii tee wutoor daare, ki tee daamii daar, ki bia tee parbiir daar, ki tee biiru nan boontu daar, ki tee bunboncheenn

daar, ki tee dachimm nan sayuŋ daar, ¹⁶ ki tee daar nba gbee nan tob naatuna fuur, nan tob kunkonkonna nba lek digbanjaana nba mok ditootii na wuyikinii.

¹⁷ Yennu yet a, “N saa baar nan biirjaann nba nae nisaarii paak, ki te ki soo kur-ii turin nan jooŋ na. Bi tun bonbiir ki turima, ki motana bi ji saa kpib, ki bi son sii puub nan nyun na, ki nikpeena saa pook tiŋ na paak.”

¹⁸ Daar nba niŋ ki Yennu wutoor tan saa do na, bi salimpeena nan salimmona na gbaa tan kan fit tinnib. Ki u wutoor nba tee nan muu na tan saa di tingbouŋ na kur. U tan saa biir ki kpir boont wunba kur be tingbouŋ na paak.

2

Baruŋ ki jiin binbeŋ lebitu po

¹ Yimm booru nba ki tiin fei na, lakint man kii mei Yennu, ² ki Yennu sennu nba jiin i kuun nan i biiru po na, nan u wutoor nba di nan muu na, nan daar nba ki u yaa wun wann u wutoor na n fit baar. ³ Jenin man Yennu boor, yimm nba tee sikin-n-moŋ damm ki be tiŋ maŋ ni kura, ki sak u sennu na. Ii tuun linba took, ki sikin i moŋ Yennu boor. Li ki gar yimm n tan nyi tubdatu ni, daar nba ki Yennu saa wann u wutoor na.

Ki jiin digbana nba lint Israel tiŋ na biiru po

⁴ Soo tan kan biar Gasa doo ni. Askelonn doo saa yaana. Bi saa jii daar bokire ki ber Asdod nan Ekronn niib, ki nyinnib bi doi ni. ⁵ Yimm Filistia teeb na, i boonta. Yimm nba be mokgbioŋ na, Yennu pak ki biiriwa. U saa biiri, ki i yenokoo

gbaa kan biari. ⁶ I tinj nba be mɔkɔgbɔŋ na saa kpant pekpaarbaauk, ki pekpaarii lanbont nan peloi sii be leŋ. ⁷ Ki Juda teeb nba biar ki mɔk manfoa na saa yent i tinj maŋ. Bi sii kpaar bi pei leŋe, ŋaan dɔɔ Askelonn teeb ŋei na ni. Bi Yomdaano Yennu sii be namm, ki ŋamm turib nyoot.

⁸ Yabint Yennu yet a, “N gbat Moab nan Amonn teeb nba sukii n niib na ki laab bianjinbawa, nan baa bia faa parbia, a bi saa fat bi tinj na. ⁹ Barmonii, min nba tee Israel teeb Yennu nba fo na, n por nan n saa biir Amonn nan Moab tinii, nan maa din biir Sodom nan Gomora doi nae. Bi tinj maŋ saa kpant yaaboote, ki sii yoo tee langbent, ki moot n pia ki loonir. Ki n niib nba tinn na saa fat bi tinj ki yentir.”

¹⁰ Moab nan Amonn teeb nba saa la tubdatu bianjinbae na, bi dont-n-moŋ nan karinbaanii nan sukii nba ki bi sukii Yabint Yennu niib ŋa paak. ¹¹ Yennu saa koomm janmaanii. U saa biir yenbis nba be tingbouŋ na paak kur, booru kur saa jianto bi tinii ni.

¹² Yennu bia saa kpi Sudann teeb.

¹³ Yennu saa jii u yiikoo ki biir Asiria teeb. U saa te ki Ninfefe doo n teen langbent nba kaa nyun. ¹⁴ Li sii tee siaminba ki pei nan nei, nan bonkob-booru nba be kur sii dɔɔe. Fiit sii dɔɔ langbent maŋ ni, ki dɔɔntir li takorii ni ki mo, ki noonbonii jak li tammɔi paak ki mo. Bi datai saa jii naajiik daat nba ki bi din jii maa na, ki yaat nann. ¹⁵ Linba nae saa tun ki tur doo nba mɔk garuk, ki dukii a u moŋ yiikooe saa tinno na. Ki doo maŋ niib dukii a bi doo nae tee digbanjaann

durinya na ni. Li tan sii tee langbente, siaminba ki muuk ni bonkobit sii dɔɔ foi. Ki wunba kur gar li po, janmaanii saa sooro, ki wun nmat poor.

3

Ki jiin Jerusalem yanbomm nan u tinnu po

¹ Jerusalem boonta, digbanbiik nan moyêtuk doo nba dia bi moŋ niib nan diabiik na. ² Bi ki gbiint, koo ki gaar Yennu kpaanii. Bi ki teen Yennu yada, koo ki boio sommir po. ³ Doo maŋ toontunna yudamm na tee nan yanbora nae, ki li barbuura tee nan kinkata na, bi mok jawuuk bonchiann, ki kan ban tenn kpabiri. ⁴ Ki Yennu sokiniinba na tee faak nan tondamm, ki mannteeb na koon Yenjiantu nasaakak jakint, ki lebit Yennu sennu na, ki diar baa loon bianjinba. ⁵ Nnaan ki Yennu bia lek daa be doo maŋ ni, ki tuun linba took, ki ki tuun linba bi. Ki sanyiok kur, ki u teen u niib na bi monii. Nnaan ki leŋ niib nba ki tee popeendamm na tuun biit, ki ki tiin fei.

⁶ Yennu yet a, “N boont digbanmuna, ki biir bi doi; ki bi joona nan bi difoot na baawa. Doi na ji tee langbente, ki sonjara na dɔɔ yann, soo ki biari. ⁷ N daan dakin nan n niib na saa turin jirimae, ki gaar n kpaanii, ki kan tamm maa dat bi tuba bianjinba na. Nnaan li daa ki yuur kaawa, ki bi yaan piin bi binbenbiik na.”

⁸ Yennu namm yet a, “Ii tee soon; ii guu daar nba ki n tan saa pak biir digbana na. Li tee n lore nan man tikir digbana nan naan yent ki taamm, ki bin bann n wutoor nba mok paŋ bianjinba. N

wutoor nba tee nan muu na tan saa di ki boont tingbounj na kur.

⁹ “Tɔn, n ji saa lebit digbana na niib dudukit, ki bi sii mei min Yennu kuukɔɔe, bi sɔɔ kan miar yenbis nba be. Bi kur saa sak n mɔbe. ¹⁰ Halii nan n niib nba yat ki be Sudann nawa tan saa baar nan piinii ki turin. ¹¹ Li yoo manj, yimm nba tee n niib na ji kan di fei, toonkpeta nba ki i tun na paaki. N saa nyinn binba mɔk garuk nan dont-n-mɔɔ na kure, ki i ji kan mi yê t n mɔb, n kasii kunkonn na paaki. ¹² N saa te ki niib nba mɔk sikin-n-mɔɔ nan soon nna binbej na n tuu baar n boor ki lon sommir. ¹³ Israel teeb nba biar ki mɔk manfoa na ji kan tun biit ki tur sɔɔ, koo ki faar faak, koo ki kpann sɔɔ. Bi sii mokitire, ki be bi yamani, ki kii tiin sɔɔ.”

Ki jiin kpinkpammuk yanj po

¹⁴ Israel niib, ii yiin yanii man, kii yikin nan kpinkpammuk.

Jerusalem teeb, ii mɔk kpinkpammuk man nan i para kura.

¹⁵ Yennu nyik i tubdatu nawa, u nyinn i datai kura.

Yennu nba tee Israel teeb kpanbar na be nani.

I ji daa tiin janmaanii.

¹⁶ Yoo baat ki bi tan saa yet Jerusalem teeb a, “Sayɔnn doo, daa tiin janmaanii.

I daa te ki li mɔki kpinkpongbatuku.

¹⁷ I Yomdaano Yennu be nani;

u yiikooe teeni nyannu.

U par sii peen i paak,

ki u saa turi manfopaann, u lomm ni.

U sii yiin yanii ki mɔk kpinkpammuk i paak.

- 18 U sii mɔk kpinkpammuk
nan niib nba tuu di jaamm nae i paak.”
U yet a, “N nyik i biiru ki bia nyinni fei dinu niwa.
- 19 Yoo baate, ki n tan saa dat binba dia-i diabiik
na tuba.
N saa nyinn wɔbii na kur bi wahala ni,
ki kpen nan binba tee yommii ki be digban-
gann na.
- N saa ŋmant bi fei dinu na ki li ji sii tee jirima,
ki durinya niib kur saa pakib.
- 20 Yoo baate, ki n saa kpen nan i niib nba yat na,
ki turi sangbenjir, durinya na lokir kur po,
ki yaan te yin mokit.”
Yennu-e pak na.

Yennu Gbouj Moor
Bimoba: Yennu Gbouj Moor Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

00d89ba0-4677-52d9-9bc5-aa3d7c5c966d